

國史書樓

清代傳記叢書



明文書局印行

清代傳記叢刊・綜錄類⑦
周駿富輯

國朝耆獻類徵初編

(十七)

卷六
卷七
卷四
至

(清)李桓輯



明文書局印行

國朝耆獻類徵初編卷六十四目錄

卿貳二十四

黃叔琳

子登賢

陳汝咸

文志鯨

穆和倫

補錄

陳汝咸

國朝耆獻類徵初編卷六十四

通奉大夫前署江西巡撫江西布政使司布政使湘陰李桓輯

御貳二十四

黃叔琳

子登賢

黃叔琳順天大興人康熙三十年一甲三名進士授編修累遷侍講四十四年丁父憂服闋補原官授山東提督學政四十八年遷鴻臚寺少卿留學政任五十一年遷通政司參議五十七年遷左僉都御史五十八年晉太常寺卿六十一年遷內閣學士尋遷刑部右侍郎雍正元年三月充江南鄉試正考官調吏部侍郎九月命偕兩淮鹽政謝賜履赴湖廣同總督楊宗仁酌定鹽價革除

陋規每鹽一包減價六釐昂不得過一錢二分四釐其安豐場鹽較梁埭場再減二釐 從之二年二月奏言兵糧撥運支給俱布政使程道爲政先期打點方撥臨近標營否卽撥遠汛加徵運費輸輓累民兵丁嗷嗷待哺查標營汛地各有定所屯衛徵收亦有定額乞 諭督撫確查兵數先儘本州縣衛所額米撥給不敷再於附近州縣撥運庶民無苛擾兵獲飽騰 上是之下部議行是月授浙江巡撫奏言各部書吏紹興人冒籍順天等處已定議改正見任浙江首領佐雜及在部候選候補之員掣得浙省缺及各省俸滿升補浙省者籍開順天直隸如實係原籍浙江均請查明咨部改補部議 從之時御史錢廷獻請濬浙江東西湖蓄水灌

田部議叔琳會同總督滿保確勘定議叔琳等奏言仁和錢塘海甯三縣田數萬頃全藉省城上下兩塘河水灌溉兩河水源皆自西湖流注湖居省西匯南北諸山水週三十餘里水由涌金門入城其出艮山門者入上塘河由臨平達海甯出錢塘者由三閘至松木場桃花港與武林門之水共注響水閘凡湖墅支河與古蕩西溪沿山之田皆資其利餘水入下塘河而仁和北鄉及錢塘之下八鄉實霑蔭焉其所以灌溉利溥者一由沿湖山水暢流入湖一由山水來路設閘以阻浮沙一由上塘五十里外有東湖爲之停蓄自閘廢土淤民占爲田埂內植桑柏蕩內栽荷蓄魚利甚微而所損三縣田畝逾鉅萬請照西湖舊址清出歸湖去埂塞開通

水源其淤泥葑草則幫築於舊隄之上以固隄址沿隄釘椿編竹不使淤泥入湖裏湖各橋建閘啟閉城內河道一爲東河一爲小河又有中西北之分係西湖血脈應酌量修濬其上塘河一帶河身支港浙省至江南吳江縣界官塘運河支河港汊壩堰阡門俱關水利應一律疏濬部議如所請三月 諭曰爾到任未久於薦舉人才處頗涉輕率嗣後當加慎重八月有密奏叔琳赴楚查鹽時受鹽商吳雨山賄關說派充總商並庇海甯陳氏僕其弟御史叔璫巡視臺灣過杭州家人與鋪戶爭鬪叔琳拘責鋪戶至死到任後杭城罷市三次 諭曰黃叔琳因前差江南主試及任吏部侍郎聲名頗好故用爲浙江巡撫自命下日屢次召見觀其精氣

頓異詔言浮泛跪領朕一切訓旨總不安詳存神敬聽彼時朕卽疑之及到浙撫之任舉薦不公敷奏不當密摺奏請之事件件支離兼多先請託在廷諸臣奏聞而黃叔琳之摺隨繼之此等作用徒自取罪戾耳朕頻降嚴諭而黃叔琳置若罔聞今覽此奏事雖屑小黃叔琳初任卽如此肆志將來放縱何事而不忍爲也大負朕之任用著解任陳氏僕人黃叔璚兩案與罷市三次情由著將軍安泰等秉公嚴審吳雨山一案著侍郎李周望等嚴審定擬具奏八月安泰等奏稱叔琳庇陳世侃僕金甯祥爭毆罪杖斃店民賀懋芳屬實並無伊弟叔璚拘責鋪戶及罷市事部議革職擬流十一月李周望等奏訊叔琳向吳雨山借貸並非賄求 詔免窮

究三年正月 命赴海塘效力乾隆元年二月授山東按察使八月疏言向例佐雜官不准相驗嗣廣西巡撫臣金鉞奏印官公出委佐雜相驗不必請鄰封但佐雜不足資彈壓又事非切己吏誤填報夤緣賄囑多致蒙混及印官承審之時惟據屍格定傷難成信讞應請仍照舊例行九月又言審案定限 欽部案件四月命案六月盜案一年限滿不結揭參後具扣限四月審結逾限二參照易結不結例議處立法至善嗣經河東督臣田文鏡題定四月限者州縣兩月解府州府州一月解司司二十日解督撫六月限者州縣三月解府州府州一月半解司司一月解督撫一年限者州縣七月解府州府州兩月解司司一月半解督撫逾限分別議

處雖以清釐適啟通融那改之弊案件遲延多不揭參至定案時
攤爲逾限不及一月例得免議竟無易結不結處分請仍照舊例
庶承審官不敢仍前怠玩部議均從之二年九月遷山東布政
使三年八月奏言東省師生空缺銀例由州縣解交學政學政造
冊移司如遇按試遠郡轉解需時或解到正值封門校士不能隨
到隨收趕副奏銷州縣多罹參處請嗣後令學政開印後覈造應
扣銀數移司其銀卽令州縣徑解司庫收兌又言養濟院孤貧口
糧每名歲給銀米三兩六錢於地丁項下撥給但編銀州縣二月
開徵可依期給發至編米例於九月隨漕徵收春夏秋三季米係
州縣將養廉折銀墊給儻養廉不能及時支領或牧令更換卽給

發徵期請酌借司庫存公耗羨銀給發至秋收徵米除給冬季口糧餘米不必易銀解還司庫卽畱備次年春夏秋口糧存倉遞及報銷部議俱如所請四年丁母憂七年服闋授詹事以山東布政使任內謨揭屬員諱盜革任十六年 諭曰原任詹事黃叔琳以康熙辛未探花年臻大耋重遇臚傳歲紀洵稱熙朝人瑞著從優加給侍郎銜二十一年卒予登賢官至副都御史

右 國史館本傳

按狀公姓黃氏諱叔琳字岷圃順天府大興縣人王父曰爾悟字某某原無爲州同知父曰華蕃字澗采大城教諭祖父皆以公貴初 封儒林郎翰林編修晉 贈通奉大夫刑部右侍郎康熙辛

未公年二十以一甲第三人成進士由編修積資洊擢卿貳開府
晚節以詹事加侍郎銜家居乾隆丙子正月卒於里第年八十有
五著 一素堂詩文集行世學者稱北平先生公之先本徽州歙
縣姓程氏本生王父曰伯起字瑞芝順治初嘗攝陝西郿縣篆旣
罷任流寓京師後索逋西遊爲盜所害本生王母柳先瑞芝公歿
子卽澗采公生甫髫而家難起養於繼母舅黃卽無爲公遂後黃
氏澗采念黃氏恩重而無爲公無嗣子終其身不忍歸宗每於霜
露節望空祀其本生父母嗚咽流涕及卒公始置木主奉安室之
西偏用成乃父之志公生五歲無爲公口授經書有神童稱閱十
有一年甲戌公在翰林又九年遷國子司業明年再遷侍讀居父

憂越三年視學山東雍正元年以刑部侍郎典試江南得人之盛
爲數十年來未有平生接引後進孜孜若不及性好著書隨時與
所善商榷參校藏書萬卷或從公借看無不應公餘坐一室中日
事披覽及登大臺令子若孫口誦而聽之有得輒筆記之其好學
如此嗟乎世謂少年科第一不幸大抵以學未成而遽竊世榮志
滿氣得則或棄其素業若涕唾然又得之旣易則不知求得者之
難甚且蔑視老成傲睨來秀而一切不以屑意若公則得自學富
之後旣得而學益進又與天下有學者共樂之至老且歿而後已
是科第不足累公而惟公乃足以榮科第而增其重也 世宗憲
皇帝在藩邸知公名及卽位數 召對稱 旨三遷至吏部左侍

郎二年出撫兩浙杭州旁邑多里巷豪猾把持鄉曲慢侮搢紳善爲飛語巧中官莫能制公銳意欲除之取其魁十許人杖而械之通衢用示媿創就中有病死者一人而適與公嫺眷同里遂以疑似被劾落職聽勘謫海塘工次效力閱六七年事漸白放歸並豁免塘工所貸官錢顧猶僦屋以居母子惴惴乾隆元年天子廉得公故儒吏無他起爲山東按察使尋遷布政使給還向所籍產於是遣子登賢歸奉母夫人吳居德壽堂舊第焉公撫浙時值夏旱禱於三竺之神步行二十餘里旋反雨大降校士撫署及敷文書院進諸生爲講畫文義諄諄然如家人以故雖在任日淺而人思之其起任山左墨吏帖息包苴不行有東來人爲予言悉與狀

合夫焉有吏畏民懷若此而冒爲殺不辜通私謁者此所以卒見
原於 先帝而再造於 聖明優游暮景以榮名終非倖致也公
之再起年已六十有五母夫人垂九十矣雍正中 先帝嘗徵
御座木瓜盛以青龍瓷盤漬以薇露而 諭曰供母聞香又 御
書德門壽母四大字榜以賜所謂德壽堂者以是得名乾隆七年
居憂服除改擢詹事尋以兩司任內事註誤追論罷職 上亦憐
公老欲休閒之前五六年庚辛鄉會兩科後輩踵門通名公爲賦
詩敘同年事 聞於 上其冬遂有復職加銜之 命且褒爲熙
朝人瑞天下榮之癸卯江南之役歸途遇一生詆謫試官而自矜
誦其文末終篇公笑止之曰秀才奈何次作云云乎其人大慚而